

Ona yurtning - olin beshiging

TINING YULDUZ

O'zbekiston Respublikasi bolalari va o'smirlari gazetasi

O'ZBEKISTON
RESPUBLIKASI
BOLALARI VA O'SMIRLARI
GAZETASI

Muassislar:

O'zbekiston matbuot va axborot agentligi,
O'zbekiston Respublikasi Xalq ta'limi vazirligi,
«KAMOLOT» Yoshlar ijtimoiy harakati,
«SOG'LOM AVLOD UCHUN» hukumatga qarashli bo'lmagan xalqaro xayriya jamg'armasi.

Gazeta 1929-yil 1-avgustdan chiqq boshlagan

2007-yil 29 - yanvar - 4 - fevral N:5 (66598)




SAHIFALARDA

«NONPOLVON»
A'LOCHILARI

3 - BETDA

**IBO BILAN
YURSIN
QIZLARJON**



6 - BETDA

«OYBARCHINNI
O'YNAGANMAN»

8 - BETDA

Muhokama uchun mavzu

O'shanda haftaning chorshanba kuni edi. Odatdagidek, erta uyg'onib maktabga oshiqdim. Birinchi soat geografiya darsi, unga alohida tayyorlanganman. Yaqinda mahallamizga kelin bo'lib tushgan, barcha birdek havas bilan qaraydigan Feruza opa bizga o'qituvchi bo'lib keldi. Istarasi issiq, shirinso'z bu ustozimiz maktabda ham tezda tanilib qoldi.

BOLALIGIM BEG'UBORMIDI?

Qulog'imizni qomatga keltirib qo'ng'iroq chalindi-yu, geografiya o'qituvchimiz Feruza opa kirib keldilar. Sinfda boshlangan g'ala-g'ovur bir zumda barham topdi. Ammo biz orziqib kutgan geografiya darsimiz to'satdan janjalga aylanib ketdi. Aksiga olib daftarimni ham unutib qoldiribman. Qo'rqa-pisa varaqqa yoza boshladim.

-Sen nega varaqqa yozayapsan? Bilib qo'y, varaqqa faqatgina darsni yozadilar, o'qituvchilar haqidagi bo'lmag'ur «mish-mish»larni emas. Meni kimligimni sendan so'rash kerak ekan-da. Sharmanda!

Avzoyi buzuq o'qituvchinning bu kinoyasini tushunolmadim. Tez orada anglaganim shu bo'ldiki, sevimli ustozimiz haqida xunuk gaplar yozilgan xatni qizlarimiz mening partam tagidan topib olishibdi... Bundan ham dahshatlisi, bu xatning muallifi aynan men emishman. Nazarimda, yuragim urishdan to'xtab qolgandek bo'ldi. O'rnimdan behol turdim. Boshimda charx urayotgan savollar tilimga ko'chdi.

-Xat qani?

-Ustoz boshqa hech kim ko'rmasin deb yirtib tashladilar, dedi baralla xuddi shu daqiqani uzoq kutganligi nigohlarida ifoda etib turgan Gulmira ismli dugonam.

Gap nimadaligini tushundim. Axir o'tgan hafta uning o'rniga meni sinf yetakchisi qilib saylashgandi-da. Ikki-uch kundan buyon qizlarni ham o'zi tomonga «og'dirib» olgandi. Gulmira birpasda yoniga uch-to'rtta qizni olib, hech kim so'ramasa ham husnixatimni tekshira ketdi.

-Mana, «a» harfi o'xsharkan, «d» harfi ham shunday...

O'sha payt o'zimni qanday oqlashimga hech ham aqlim yetmas, go'yo bu manzaralar tushimda bo'layotgandek edi. Xullas, urinishlarim zoye ketdi. O'qituvchilar orasida muhokama bo'ldi. Maktabdan bezib qoldim. Bolalik quvonchlarimga raxna solgan bu voqea vaqt o'tishi bilan unutila boshladi. Oradan yillar o'tdi. Gulmira bilan yelkadosh o'sdik. O'sha xatni kim yozgani noma'lumligicha qolaverdi. Aybdor esa men bo'lib qoldim. Geografiya ustozimiz tasavvurimda o'sha-o'sha vajohatli holatda qolib ketdi. Biroq, bu voqeaning og'riqli taassuroti vujudim bilan birga ulg'aydi. Goh-goh Gulmira bilan uchrashib qolamiz. Bir vaqtlar men nomini topa olmagan tuhmatning chidab bo'lmas tug'yoni ko'zlarimda isyon ko'taradida, uning ko'zlariga o'q bo'lib qadaladi. Men esa nigohlarini qaylargadir olib qochayotgan dugonamning ko'zlarida o'sha haqiqatning hanuz o'chmagan uchqunlarini ko'raman.

Umida SADATOVA.



Maktabdan reportaj

SAVODXONLIK BAYRAMI BO'LDI

-Men birinchi sinfda o'qiyman. Sinfimizdagi 30 nafar o'quvchilarning barchasi ustozimiz Gulnora opa tufayli o'qish-yozishni o'rganib olishdi. Yaqinda «Savodxonlik bayrami» o'tkazdik. Bayramda o'zimiz yod olgan she'r va qo'shiqlarni ijro etib, raqsga tushdik. Tadbirga tashrif buyurgan ota-onalar bizni qarsaklar bilan olqishlab turishdi. Bayramimiz so'nggida biz ota-onalarga va ustozlarimizga gullar taqdim etdik. Men sevimli gazetamiz orqali ustozimiz Gulnora opaga uzoq umr, sihat-salomatlik tilayman. Shu bilan birga, barcha sinfdoshlarimga a'lochi va namunali o'quvchi bo'lishlarini istab qolaman.

Iqboloy NORMUHAMMEDOVA,
Xorazm viloyati, Shovot tumanidagi
33-maktab o'quvchisi.

Suratdagi tengdoshingizning ismi Behzodjon. U poytaxtimizdagi 110-maktabning 1-sinfida a'lo baholarga o'qiydi. Ingliz, rus tillarida bemaol so'zlasha oladigan, izlanuvchan Behzod o'qishdan bo'sh vaqtlarida sportning «U-shu» to'garigiga ham qatnashadi. Yana u kompyuterda turli dasturlarni ham bajara oladi. Rasm chizish esa jon-u dili.



AYB KIMDA?

Dars boshlanish arafasida barchamiz shosha-pisha joy-joyimizni egallay boshladik. Sinfga kirib kelgan Nilufar tez-tez yurib keldi-da, Mohichehraning partasiga o'tirmoqchi bo'ldi. Shu payt Bahodirdan kitobini olgan Toshboy undan oldin partaga joylashib oldi. Partalar oralab kelayotgan Nilufar qizlarga nimalarnidir tushuntirganicha Toshboy ni ko'rmasdan uning tizzasiga o'tirib oldi va xuddi tok urgandek sakrab o'rnidan turib ketdi. Bir zunda «gurr» etib kulg'u ko'tarildi. Qizarib ketgan Nilufar Toshboy bilan urisha ketdi. Toshboy bo'lsa, o'zing-ku o'tirib olgan, menga nima deysan, deganicha o'zini oqlashga urinardi. Qiziq, ayb kimda ekan-a?..

Mo'mina EGAMBERDIYEVA,
Alisher Navoiy nomli Nafis san'at
litseyining 8-«A» sinf o'quvchisi.

ONA HAQIDA IKKI SHER



Shirin so'zlab boshim silagan,
Tarbiyalab o'stirgan onam.
Kamolimni ko'ngildan tilar,
Mehribonim, munis, yagonam.

Misli gulman, bog'bonim onam,
Asrar mudom nogoh ozordan.
Boshginamda parvona har dam,
Qadri baland ming tillo-zardan.
Sayyora ABDURAHMONOVA,

Jizzax viloyati, Zomin tumani, «Chol» qishlog'i.

* * *

Onajonim, yagonadirsiz,
So'zi mayin durdonadirsiz.
Quyosh kabi mehringiz bisyor,
Siz tufayli baxtimizdir yor.

Kechalari alla aytasiz,
Oromlardan bir zum qaytasiz.
Baxtimizga bo'ling sog'-omon,
Yaxshiyam siz borsiz har zamon.

Yodda qolgan ertaklaringiz,
Ezgulikka yetakladingiz.
Yorishadi tunlar kulsangiz,
Biz tufayli baxtga to'lsangiz.

Gulhayo SARMONOVA,
Samarqand viloyatidagi
60-maktabning 8-«V» sinf o'quvchisi.



O'ZBEKISTON

Dunyoda bir o'lka bor,
Osmoni ko'k, beg'ubor.
Ming asrlik tarixi,
Olamda yo'q ta'rifi.
Gulzorining to'rida,
Navo qilar bulbullar.
Bulbullar navosiga,
Raqsga tushadi gullar.
Jannatmakon bu o'lka,
Ko'rmasin hech ham zavol.
Farzandlari ulg'ayib,
Kundan-kun topar kamol.

Ozod, erkin bu makon,
Barchamizga qadrdon.
Nomi dunyoga mashhur,
Jonajon O'zbekiston!

Muhayyoxon OLLOBERGANOVA,
Xorazm viloyati, Shovot tumanidagi
17-maktabning 6-sinf o'quvchisi.

ODAM SUV ICHAR BO'LSA...

Mirali bilan Sherali qalin o'rtoq. Bir maktabda o'qishadi. Miralining shirins'o'z, mehribon bobosi bor. Ular katta hovlida yashashadi. Bir kuni maktabdan ertaroq qaytishayotgan ikki do'st koptok tepish bahonasida Miralilarning hovlisiga kirishdi. O'yin qiziganidan-qizidi. Chanqog'ini qondirish maqsadida suv idishidan shosha-pisha suv ichayotgan Sheralini Mirali ataylab kelib turtib yubordi. Egri-boshiga suv to'kilgan Sherali do'stiga g'azab bilan tikilib qoldi. Daraxt shoxini qirqib tekislayotgan bobosi buni ko'rib:

—Obbo shayton-e-ey, bu nima qilganing?

—Ataylab qilmadim, bobojon. Koptok tepib kelayotgan bo'lsam... O'zi yo'limdan qochsa bo'lardi-ku.

—Ey, bolam-a. Senga aytsam, xalqimiz orasida «Odam suv ichayotganida ilon ham tegmaydi», degan gap bor. Shu boisdan ham suv ichayotgan kishiga xalaqit berish eng yomon holat. Buni yodingda tut.

Bobosining bu so'zlaridan Miralining eti jimirlab ketdi. Zo'rg'a boshini ko'tarib: —Meni kechir, Sherali, — dedi.

Mahbuba SHAMSIYEVA,
Navoiy viloyati, Xatirchi tumanidagi
«Qoracha» qishlog'i.

USTOZ BERGAN MEHR TUFAYLI

Men 73-maktabning 8-«V» sinfida o'qiyman. Sinfimizda 30 nafar o'quvchi bor. Barchamizni ko'nglimizni birdek tushunadigan sinf rahbarimiz Mohira opani juda-juda hurmat qilamiz. Sababi, o'g'il bolalar bilan o'g'il bolacha o'rtoq bo'lib, qiz bolalar bilan esa haqiqiy dugona bo'lib sirlashishdan erinmaydilar. Shu boisdanmi, sinfimiz o'quvchilarining bir-biri bilan bo'lgan ahilligiga barchaning havasi keladi. Hatto ta'til vaqtlarida ham bir-birimizni yo'qlab turamiz. Ta'lim maskanimiz direktori Lutfiya Saidovanning say'-harakatlari bois, yaqinda maktabimizga yangi kompyuterlar olib kelishdi. Bundan rosa quvondik. Ustozimiz:

—Kompyuterda ishlayotganingizda albatta bir maqsad bilan ishlash lozim. Yo'qsa, vaqtiniz behuda ketadi,— deydilar. Sinf rahbarimiz Mohira Rajabovanning jonkuyarligi, hamisha bizni o'ylab

yurishlariga namunali xulqimiz, «a'lo» va «yaxshi» baholarimiz bilan javob berishga harakat qilyapmiz. Sinfimizda biror marotaba sababsiz dars qoldirish, darsdan ketib qolish, uy vazifalarni bajarmay kelish kabi holatlarni uchratmaysiz. Agar shunday bo'lganida, sinf rahbarimiz qattiq ranjib qolardi. Biz esa ularni xafa qilishni aslo istamaymiz.

Avazbek VALIXONOV,
Yakkasaroy tumanidagi
73-maktabning 8-«V» sinf o'quvchisi.



BOG'CHAMIZNING NOMI «GULBAHOR»

Muhriddin, Aziza, Rustam kabi o'rtoqlarim yaxshi qo'shiq kuylashadi. Maskanimizda kulolchilik, rasm chizish, sport, raqs kabi turli mashg'ulotlar o'tkaziladi. Bog'chamizda aslo zerikmaymiz. Qor yog'ib, qattiq sovuq bo'lsa ham bog'chamiz issiqqina. Ammo bog'chamizda muddatini o'tab bo'lgan jihozlar bor. Qaniydi, ertaklardagi kabi bir uxlab turganimizda ular yangilariga almashib qolsa...

Samarqand viloyati, Narpay tumanidagi
«Gulbahor» nomli 9-maktabgacha ta'lim muassasasi
tarbiyalanuvchisi Nurbekjon
OTABEK o'g'lining so'zlarini
MOHINUR oqqa ko'chirdi.



Bizning qo'shiqlarimizni eshitib, she'rlarimizni tinglab, kuchimiz va bilimdonligimizni sinab ko'rmoqchi bo'lsangiz, albatta bog'chamizga keling. Tarbiyachi opalarimiz Mukarram Ashurova, Zulayho Niyozova, Rohila Daminova, Gulchehra Bo'riyeva, Yulduz Hasanova kabi bog'cha opalarimiz sizni ham xuddi biz kabi quchoq ochib kutib olishadi. Ular juda shirins'o'z. To'lg'anoy buvijonimning aytishlaricha, bog'cha opalarimiz ertalab uylarida ko'p-ko'p shirin choy ichishgani uchun bizni shirin so'zlar bilan kutib olishar ekan. Maskanimiz mudirasi Jamila opa Rahmonova har kuni musiqa xonamizga kirib, ustozimiz Eshmamat Bobomurodovning biz bilan olib borayotgan mashg'ulotlarini diqqat bilan kuzatadilar. Ularning aytishlaricha, kuy va qo'shiqlar bizni hamisha ilhomlantirarkan.



HOMIYLAR KO'MAGI BOIS...

2007 - «Ijtimoiy himoya yili»ni Rossiyaning O'zbekistondagi elchixonasi, Rossiya chet el markazi va Respublika «Sog'lom avlod uchun» xalqaro xayriya jamg'armasi vakillari hamkorlikda poytaxtimizning turli go'shalarida istiqomat qilayotgan 140dan ortiq ijtimoiy himoyaga muhtoj oila farzandlariga ko'mak bilan boshladilar.

2-yanvar kuni Toshkent viloyati, Chirchiq shahrida joylashgan «Bo'ston» sihatgohi qoshida tashkil etilgan «Bo'ston» oromgohiga tashrif buyurgan bolajonlar sal o'tmay bir-birlari bilan tanishib, tezda do'stlashib ham oldilar. Ularning sho'x qiyiqirlari shu kuni sihatgohga o'zgacha fayz kiritdi.

OROMGOH HAYOTI YOKI «ISTE'DODLARNI IZLAYMIZ»

Mana, nihoyat kechki tadbirlar vaqti ham keldi. O'n kunga mo'ljallangan tadbirlar turli xil «Iste'dodlarni izlaymiz» tanlovida guruh tarbiyachilari o'z iste'dodlarini sinab ko'rishdi: «Videokliplar kuni», «Sirk, sirk, sirk» o'ldar olamiga sayohat», «Moda - 2007» tanlovi o'tkazildi. «Moda - 2007» tanlovida bolalar o'z qo'llari bilan yaratgan turli fasllarga mos libo-larni namoyish etdilar.

Reja bo'yicha o'tkaziladigan tadbirlardan keyin har oqshom o'tkaziladigan diskoteka yoki kinofilmlar namoyishi bolajonlarni yana-da zavqlantirdi.

TO'GARAKLAR BOLALAR IXTIYORIDA BO'LDI

—Oromgohimizda to'garaklar juda ko'p. Men birinchilardan bo'lib raqs to'garagiga a'zo bo'ldim. Maqsadim, o'zbek milliy raqsini o'rganish, — dedi

Aziz bolajonlar! Qishki ta'til o'tib ketganiga bir necha kun bo'lgan bo'lsa-da, uning taassurotlari hali-hanuz qalblaringizni tark etmagan bo'lsa kerak. Quyidagi tengdoshlaringizning yodida qishki ta'til kunlari bir umrga yetgulik taassurotlarga boy bo'ldi, desak adashmaymiz. Buning sababi esa, ular ta'til davomida oromgoh bag'rida mazza qilib dam oldilar va salomatliklarini yana-da tikladilar.

biz bilan suhbatda 4-guruh tarbiyalanuvchisi Krosnoyarskaya Aleksandra. —Ilk raqsimizni oromgohning tantanali ochilish marosimida, karnavalda ijro etish niyatidaman.

—Ismim Sirojiddin, Shayxontohur tumanidagi 40-maktab o'quvchisiman. Yoshim 18da. Sportga qiziqqanim uchun menga oromgohda o'tkazilgan sport musobaqalari juda yoqti. Men shashka bo'yicha o'g'il bolalar o'rtasida oromgoh chempioni bo'ldim. Guruhimiz bilan futbol turnirida 1-o'rinni qo'lga kiritdik. Uch kun davomida o'tkazilgan spartakiadada ko'plab do'stlarim shaxmat, uzunlikka sakrash, suzish, qaynoq startlar, tennis musobaqalari bo'yicha ishtirok etib, yaxshi natijalarga erishdilar.

Shuningdek, oromgohda «Mohir qo'llar», «Rus va ingliz tili saboqlari», «Erudit», «Tasviriy san'at» va «Sport» to'garaklari faoliyat ko'rsatayotgan ekan.

OROMGOH KARNAVALIDA HOMIYLAR SOVG'ASI

Mana, nihoyat orziqib kutilgan kun keldi. Oromgoh karnavaliga har bir bola alohida tayyorgarlik ko'rgan.

Sog' yurak - tog' yurak

Turli niqoblar, chiroyli kiyimlar bundan dalolat beradi. Bayramga Rossiyaning O'zbekistondagi elchisining rafiqasi Muhamedshina Nailya Axtamovna, Respublika «Sog'lom avlod uchun» xalqaro xayriya jamg'armasi ijrochi direktori Alimjonova Dilbar Margupovna va boshqa bir qator mehmonlar tashrif buyurdilar.

Bolajonlar o'zlari tayyorlagan konsert dasturlari bilan yig'ilganlarni xushnud etdilar. Bayram so'nggida ularga homiylar tomonidan ajratilgan sovg'alar topshirildi.

Mehmonlar har bir bola bilan suhbatlashib, ularni fikrlari bilan qiziqdilar.

XONANDA BILAN UCHRASHUV

Eng qizig'i mavsum so'nggida bo'ldi. Oromgohda O'zbekiston xalq artisti, «Ko'ngil ko'chalari» qo'shig'i ijrochisi Anvar G'aniyev bilan ijodiy uchrashuv o'tkazildi. Uchrashuvdan so'ng xonandaning qo'shiqlari bir-biriga ulanib ketdi.

—Bu yilgi qishki ta'til men uchun juda qiziqarli o'tdi. Turli xil tadbirlarda ishtirok etdim, to'garaklarga a'zo bo'ldim, muhimi, yangi do'stlar orttirdim. Bularni tashkil etib homiylik qilgan tashkilotlarga, oromgohimiz rahbari Abdurahmonova Saida Turdaliyevna va barcha tarbiyachi yetakchilarga o'z minnatdorligimizni bildiraman. Men «Bo'ston» oromgohida o'tkazgan kunlarimizni hech qachon unutmayman, —deydi Mirzo Ulug'bek tumanidagi 210-maktabning o'quvchisi Sabina Abdullayeva.

Mavsum so'nggida homiylar ushbu loyihani kelgusi yillarda ham davom ettirish niyatlari borligini aytishdi.

Nazokat VALIYEVA,
O'zMUning o'zbek filologiyasi
fakulteti talabasi.

«Yakkatut» savdo ishlab chiqarish mas'uliyati cheklangan jamiyatlari bilan hamkorlikda ish olib borishdi. Shahnoza va Laliz kelajakda shifokor bo'lishmoqchi. Bu yo'lda ularga biologiya fani o'qituvchisi Yulduz opa Abdullayeva eng yaqin maslahatchi.

«Nonpolvon» faollarni aniqlashda davom etadi: 3-o'ringa Surxondaryo viloyati, Termiz shahridagi 13-maktab futbol terma jamoasining eng mashhur hujumchisi Jamshid Kenjaboyev loyiq deb topildi. Jamshid o'qiydigan maktab Internet tarmog'iga ulangan ekan. U kompyuterda ishlashni yaxshi bilgani uchun ham veb-saytlarda kerakli manbaalarni to'play olgan. Keyin unga maktab oshxonasi oshpazi Marina opa, ustoz Gulchehra opa Ashurovalar yaqindan yordam berishibdi.

Andijon viloyati Xalq ta'limi boshqarmasiga qarashli 21-maktab-internati 10-sinf o'quvchisi Gulnoz Siddiqovaning «Salomatlik garovi» ruknida viloyat radiosining «Tengdosh» radiojurnalida tayyorlagan qiziqarli eshittirishlari tanlovning 2-o'rinini egalladi. Gulnoz kelajakda jurnalist bo'lmoqchi, u ajoyib insho va maqolalar ham yozadi.

Ziyoda Allamurodova Qoraqalpog'iston Respublikasi, Kegayli tumanidagi 14-maktabning 9-sinfida o'qiydi. Uning ikkinchi ijodiy ishi tanlovning 1-o'ringa munosib topildi. Ziyoda kamqon onalar va bolalar uchun sanatoriyalar

Темпера бои
УНИ
САЛОМАТЛИК
ГАРОВИ!


Unni
boyitish bo'yicha
milliy dastur

ochish masalasini ham yoritgan ekan. Tadbir tashkilotchilari hamda Xalq ta'limi vazirligi yetakchi mutaxassislari va Respublika qon quyish Ilmiy Tekshirish Instituti xodimlari, Xalq ta'limi bo'limi vakillari o'quvchilarni esdalik sovg'alari va «Faxriy yorliq»lar bilan taqdirlashdi.

Unni boyitish haqida qabul qilingan Milliy Dasturni amalga oshirish uchun global Alyans tomonidan 2,8 mln. dollar miqdorida grant ajratilgan.

Muhabbat HAMIDOVA,
Nodira MIRZAYEVA.

«NONPOLVON»
A'LOCHILARI



Siz hozirda nonning nima uchun «Nonpolvon» deb atalayotganini bilsangiz kerak? Axir boyitilgan undan yopilgan non kuchli, baquvvat bo'lishi aniq-da. Jahon sog'liqni saqlash tashkiloti aniqlashicha, dunyoning 40 foiz aholisi kamqonlikdan aziyat chekadi, shundan 75 foizi temir tanqisligi tufayli yuzaga keladi. Kamqonlik kasalligini bartaraf etish uchun jahondagi 48ta mamlakatda un temir moddasi va foliy kislotasi bilan boyitiladi. O'zbekiston bugungi kunda un boyitiladigan mamlakatlar safidan joy olgan.

Kuni kecha Respublika bolalar va o'smirlar Davlat kutubxonasida unni boyitish haqida qabul qilingan Milliy Dasturni amalga oshirish yuzasidan Respublika o'quvchilari orasida e'lon qilingan. «Salomatlik garovi» mavzusidagi insholar va radioeshittirishlar tanlovi g'oliblarini taqdirlash marosimi bo'lib o'tdi. Unda yurtimizning turli viloyatlaridan kelgan a'lochi, faol, ijodkor o'quvchilar to'planishadi.

Buxoro viloyati, Jondor tumanidagi 20-ixtisoslashgan maktab-internatining 9-sinf o'quvchilari Shahzoda Asadova hamda Laziz Elmurodov tanlovning rag'batlantiruvchi mukofotiga sazovor bo'lishdi. Ular tanlovga tayyorlanish jarayonida tuman Markaziy shifoxonasi,

IBO BILAN YURSIN QIZLARJON

Mirzo Ulug'bek tumani hokimiyati, tuman Xalq ta'limi bo'limi, «Kamolot» YOIH, «Ma'naviyat va ma'rifat markazi» boshchiligida o'tkazilgan

«Malikalar» tanlovida 18-, 64-, 207-, 210-, 221-, 222-, 241-, 256-, 308-maktablarning 7-9-sinf o'quvchilari ishtirok etishdi. Tanlovning bosh maqsadi o'quvchilarni ijodkorlikka, izlanuvchan-



bilan namoyish qilishdi. «Xayoliy gazak-dasturxon bezagi» shartida esa qizlarning o'z qo'llari bilan qisqa fursatda tayyorlagan turli-tuman parhez bop salatlari, devoriy gazetalarning qiziqarli ko'rgazmasi, badiiy qism – barcha-barchasi yig'ilganlarda katta taassurot qoldirdi. G'oyat qizg'in o'tgan ushbu tanlovda 256-maktab o'quvchisi Hilola Yusupova va 221-maktab o'quvchisi Regina Kraspovalar III o'rinni egallashdi. 241-maktab o'quvchisi Zarina Nishonovaga II o'rin, 18-maktab o'quvchisi Maftuna Umrzoqovaga esa I o'rin nasib qildi. 64-maktab o'quvchisi

Zulfiya Boqiyeva tanlovning mutlaq g'olibi deb topildi.

Mirzo Ulug'bek tumani Xalq ta'limi bo'limining ma'naviyat-ma'rifat ishlari bo'yicha bo'lim boshlig'i Durdona Qosimova g'olib malikalarga qimmatbaho sovg'alar va «Faxriy yorliq»larni topshirar ekan, shunday dedi:

–Ishtirokchilarning mazkur tanlovga ustozlari boshchiligida har tomonlama puxta tayyorgarlik ko'rganligi, ayniqsa, liboslarida milliylikka alohida e'tibor berilganligi hakamlar tomonidan yuqori baholandi. G'olib qizlarimizning topqirligi hamda chaqqonligi tahsinga sazovordir.

–Tumanimizdagi ta'lim maskanlari o'rtasida muntazam ravishda o'tkazilayotgan turli tanlovlar, bellashuvlar, qiziqarli sport musobaqalari yangi-



yangi iste'dod egalarini kashf qilmoqda. Biz esa ularning iqtidorini yuzaga chiqarishga qo'limizdan kelganicha harakat qilayapmiz, - deydi tanlov tashkilotchilaridan biri tuman Xalq ta'limi bo'limining targ'ibot-tashviqot ishlari bo'yicha uslubchisi Shirmonoy Asranova.

Tanlov so'nggida sahnaga chiqib kelayotgan bir-biridan nazokatli, nafosatli g'olib qizlarni ko'rib, beixtiyor tarbiya bergan ota-onalari-yu ustozlariga rahmatlar aytgimiz keldi. Ularning egnidagi o'zbekona bejirim liboslari va yuzlarida aks etgan shirin tabassumidan atrof yana-da yorishib ketgandek bo'ldi. Barcha shartlarni qoyilmaqom qilib bajarishgan bu malikalar chindanda maqtovga loyiq edilar.

Biz ham o'z navbatida tanlov tashkilotchilari, uning ishtirokchilari va g'olib malikalarning kelgusi o'qish va ishlariga zafarlar tiladik.

Jamila HAYDAROVA.



likka, mustaqil fikrlashga, bir so'z bilan aytganda, maktabdan tashqari ta'lim samaradorligini oshirishga qaratilgan edi. O'quvchilar milliy qadriyatlarimiz, urf-odatlarimiz mujassamlashgan «Mehnatdan kelsa boylik, turmush bo'lar chiroylik» mavzusidagi shart bo'yicha sahna ko'rinishlarini g'oyat ustamonlik

Maktabimizda

Tadbir

turli tadbirlar tez-tez o'tkazilib turiladi. Uning taassurotlari esa anchagacha tillarimizdan tushmaydi. Yaqinda maktabimizda mana shunday qizg'in bahsmunozaralarga boy bo'lgan «Qizlar davrasi» bellashuvi bo'lib o'tdi. Unda 10-11-sinf qizlari ishtirok etishib, tanishuv, jonli sahna, pazandalik, kasb haqida tushuncha, erkin mavzu

singari shartlar bo'yicha bellashdilar. Tadbirimiz qizg'in tarzda boshlandi. Avvaliga «A» sinf ham, «B» sinf

DAVRANI KENGROQ OLING!

ham bo'sh kelishmadi. Kasb haqida tushuncha berish sharti bo'yicha «B», ya'ni bizning sinfimiz oldinga o'tib oldi. 5 kasbga alohida to'xtalib she'r orqali ifodalab berdik. Pazandalik sharti bo'yicha esa «A» sinfning qo'li baland keldi. Ular birpasda hakamlarning oldini turli noz-u ne'matlar bilan to'ldirib tashladilar. Qolgan shartlarda esa tenglik ko'zga tashlanib turdi. «Qizlar davrasi» tadbirimiz do'stlik ustunligida nihoyasiga yetdi.

Bu kabi qiziqarli tadbirlarning tez-tez o'tkazilib turilishi o'quvchilarni biroz bo'lsa-da darslardan chalg'itadi, ularni madaniy hordiq chiqarishlariga yordam beradi, ma'naviyatini, madaniyatini oshiradi. O'quvchilarni o'zlarini ustida ko'proq ishlashga undaydi. Mana shunday qiziqarli tadbirdarni tashkil qilishdan, o'tkazishdan aslo charchamang, aziz tengdoshlar!

Ma'fura JAMOLIDDINOVA,
Toshkent viloyati, Zangiota tumanidagi
24-maktabning 10-«B» sinf o'quvchisi.

VATAN

Shirin-shakar o'zbek tilim,
Hurlik ila ravshan dilim,
Mute'likdan xalos elim,
Menikidir bu Vatan.
Bolaligim baxtli etgan,
Istiqlolni naqdli etgan,
Boy- badavlat, taxtli etgan,
Menikidir bu Vatan.
Yurgan yo'lim so'lim gulzor,
Ilm eshigi ham intizor,
Bari menga – har neki bor,
Menikidir bu Vatan.
Orzularga berar qanot,
Xafa etmay siylar hayot,
Chunki men ham buyuk avlod,
Menikidir bu Vatan.

QISH

Ayni chog'i ukpar qish
To'ldi g'ayratga,
Muzdan kamar boylamish
Qarg'a hayratda.
Pardoz quti, mo'yqalam
Yoniga soldi,
Uyma-uy, ko'cha, dala –
Yayov yo'l oldi.
Daraxtlarga kiygazdi
Nuqra ko'ylaklar,
Xonalarni bezadi
Guldor oynaklar.

Tomga popuk misoli
Sumalak soldi,
Qishning oppoq soqoli
Tarnovda qoldi.
Qish atrofga berib zeb
Tunda oldi dam,
Manzaraga boqay deb
Tursa subhidam,
Qahraton qish qahrini
Kesibdi quyosh,
Mehnatiga achinib,
Qish to'kdi ko'z yosh.

Aziz bolalar, ota-onangiz, aka va opalaringiz shoira Gulchehra JO'RAYEVAning she'rlarini yod olib, qo'shiqlarini kuylab ulg'ayishgan. Mustaqil yurt jamoli, odamlarimiz bunyodkorligi, farzandlarning kamoloti shoira qalbiga ilhom soladi. Yurt tinch, osmonimiz musaffo ekan, bizdan baxtli ona yo'q. Bu baxtiyorlikni bastalagan Gulchehra JO'RAYEVA barcha havas qilgudek baxtli onadir.

TUG'ILGAN KUN

Sochlaring uzun-uzun,
Ko'zlaring qora uzum,
Bo'ylaring novda qayin,
Qadaming mayin-mayin.
Uch bahor latofati,
Uch qishning sharofati,
Uch kuz asal sharbati,
Uch yoz saraton tafti.
Bari senda mujassam,
Shirin-u shakar desam,
Ishonmaydi so'zimga,
Savol bering o'ziga:
Adam-la oppoq, deydi,
Oyim-la qaymoq, deydi.
Mohi esa yig'loqi,
Ozgincha chatoq, deydi.
Chatog'im yig'lama,
Ukalarga opa bo'l.
Yoshing yoshga ulanib
Buving kabi yuzga to'l.

–Maktabimizda barcha fanlardan to‘garaklar bor. Men rus tili, ingliz tili, informatika, kimyo, matematika fanlariga juda qiziqaman.

Maktabimizda faoliyat yuritayotgan koreys tili

to‘garagiga qatnashaman. Bu to‘garakka talabchan

ustozimiz Yuliya

Borisovna

rahbarlik

qiladilar.

–Koreys

alifbosi

xitoy, yapon

iorig-

liflaridan

farq qiladi-

mi? Nima

uchun bun-

day murak-

kab tilni

o‘rganish-

ga qaror qil-

gansiz?

–Koreys tilini o‘rganishga

azaldan havas qilardim. Koreys yozuvi boshqa

iorigliflardan farq qiladi. Koreys alifbosida 40ta harf

bo‘lib, ayrim chiziqlar orqali so‘zning talaffuzi yoki

ma‘nosini ham o‘zgartirib yuborish mumkin. Bundan

tashqari, ingliz tiliga ham qiziqaman. Ingliz tilidan

oyijonim Mavluda opa Nurillayeva kollejdada dars

berish bilan birga menga ham ingliz tilini

o‘rgatishdan charchamaydilar.



–Badiiy adabiyotlarga ham qiziqasizmi?

–Albatta. Pirimqul Qodirovning «Yulduzli tunlar», Tohir Malikning «Murdalar gapirmaydilar» kitoblarini o‘qib chiqdim. Bundan tashqari, «Bekajon»

TIL BILGANGA...

Tengdoshingiz Muyassar QURBONOVA Sergeli tumanidagi 301-maktabning 8-«V» sinfida o‘qiydi. Muyassar maktabda a‘lo baholarga o‘qishi, tirishqoqligi-yu mehnat-sevarligi bilan boshqa o‘quvchilardan ajralib turadi. Muyassar bilan bo‘lgan suhbatda yana quyidagilarni bilib oldik:


gazetasidagi «Ajal g‘ori», «Oltin vasvasasi» singari detektiv qissalarni o‘qib boraman.

–Anglashimcha, sizni ko‘proq detektiv va tarixiy qissalar yoqarkan. Bunday qissalarni yozishni o‘ziga yarasha murakkabligi bo‘ladi. O‘quvchi esa har bir jumboqni sergaklik bilan anglab olishi kerak bo‘ladi.

–Menga detektiv qissalarning aynan shu jihati yoqadi. Chunki har bir elementar narsaning ham isboti talab qilinadi.

–Darslardan, to‘garaklardan bo‘sh paytlaringizda nimalar bilan shug‘ullanasiz?

–Tortlar, pishiriqlar pishiraman. She‘rlar yozib turaman. Ilk she‘rimni 3-sinfdaligimda yozgandim.



Nargiza


Yozgan she‘rlarimni oyim bilan dadamlar tahrir qilib berishadi. Elimizga taniqli shoirlardan Muhammad Yusuf, Umida Abduazimova, hassos shoirlardan Bobur, Navoiy g‘azallarini o‘qib, yod olib turaman. Ko‘p kitob o‘qigan bolaning aqli ham, fikrlash dorasi ham teran bo‘ladi. Shuning uchun ham doim kitob mutolaa qilib turaman.

–Kelajakda kim bo‘lmoqchisiz?

–Chet tillarini yaxshi o‘zlashtirib, tilshunos bo‘lmoqchiman.

–Kelgusi ishlaringizda sizga omad tilaymiz. Endi ismingizni koreys alifbosida yozib bera olasizmi?

–Albatta.



Suhbatdosh: NARGIZA.

Yuksak taraqqiyot sari yuz tutgan mustaqil diyorumiz kun sayin gullab-yashnab bormoqda. Prezidentimiz tomonidan belgilab berilgan «Ijtimoiy himoya yili»miz oldingilari kabi tariximiz sahifalariga zarhal harflar bilan yozilib qoladi. Yurtboshimiz aytganlaridek: «Eng muhimi, yordamga ehtiyoj sezib yashaydigan oilalar va odamlarning barchasiga bir ko‘z bilan qaramasdan, balki har bir toifaning o‘ziga xos qiyinchiligi va dardi, g‘am-u tashvishlarini o‘rganib, bu yaqindan ehtiyojlarni qondirishga qo‘limizdan kelganicha harakat qilishimiz kerak».

Ayni vaqtda bu so‘zlar har bir insonda homiylik g‘ururini uyg‘otadi, desak mubolag‘a emas. Xo‘sh, yilimizni bunday ta‘riflashdan maqsad nima edi? Birinchidan, homiylarning mavqei va maqomini belgilab berish, ularni rag‘batlantirish – bu hayotiy zarurat, ehtirom ifodasi. Qalbi daryo xalqimiz, ayniqsa, vatanimiz tayanchi bo‘lmish yoshlarimiz ongi va tafakkurida mehr-muruvvat, saxovat fazilatlarini mustahkamlash, aholining yordamga muhtoj qatlamini moddiy va ma‘naviy jihatdan qo‘llab-quvvatlash, sog‘liqni saqlash tizimining moddiy-texnik bazasini yana-da mustahkamlash, tibbiyot xodimlari uchun munosib mehnat va turmush sharoitini yaratish – «Ijtimoiy himoya yili»ning asosiy vazifasidir. Ayni vaqtda, ta‘kidlab o‘tilganidek, jamiyat taraqqiyotini butunlay iqtisodiy munosabatlarga bog‘lab qo‘yish to‘g‘ri emas. Odamlar irodasi, ularning azm-u qarorlarini ham unutmash kerak. Buyuk ajdodlarimiz Amir Temur, Xo‘ja Ahror Valiy, Najmiddin Kubro,

Alisher Navoiy kabi bobolarimizning homiylik bobida amalga oshirgan ibratli ishlaridan zamondoshlarimizni va albatta yoshlarimizni xabardor etish lozim. Binobarin, har bir jamiyatning ma‘naviyat darajasi uning iste‘dodli, qobiliyatli shaxslarga har tomonlama g‘amxo‘rlik ko‘rsatishi hamda kamol topishi uchun shart-sharoit yaratib berishi bilan belgilanadi. Rivojlangan, madaniyati yuksalgan jamiyatlarda ilm sohiblari, iste‘dodlar, ma‘naviyatli, pokiza insonlar millatning yuzi, g‘ururi, kelajagi deb qaralishi ham shundan. Ahmad Yassaviy, Alisher Navoiy, Abdulla Avloniy, Mahmudxo‘ja Behbudiy, Abdurauf Fitrat kabi buyuk bobokalonlarimizning homiylik va saxovat borasidagi ko‘plab ibratli so‘zlarini o‘qiganmiz. Bir so‘z bilan aytganda, bobolarimiz ma‘naviy jihatdan chinakam boy-badavlat kishilar edilar. Biz yoshlarga hamisha ana shunday fazilatlarga ega bo‘lish ham qarz, ham farzdir. Donolar da‘vat etadilar: birinchidan yuz, ikkinchidan

hamyon, uchinchidan darvoza ochiq bo‘lishi kerak. Dil bilan tilning bir bo‘lishi uning yaxshi inson ekanligi belgisidir. Buyuk alloma Ahmad Yassaviy aytganidek: «Bir yetimning boshini silagan kimsa qiyomatda do‘zaxga buyuriladigan bo‘lsa, uning o‘rniga mening o‘zim do‘zaxga tushaman». O‘z zamonasida Navoiy bobomiz g‘arib-u devonalar uchun «Shifoia» shifoxonasini qurdirgan. Ushbu shifoxonaning 30 yilga yetadigan muolajasini jamg‘arib qo‘ygan. Avloniy bobomiz esa Toshkentning «Degrez» nomli mahallasida yangi maktab ochgan.

Qur‘oni Karimning «Baqara» surasida ta‘kidlanganidek: «Sizlardan nimalarni infoq (saxovat) qilishni so‘raydilar. Aytin: qanday yaxshilik qilsangiz, otanonaga, qarindoshurug‘ga, yetim-yesirlarga va yo‘lovchi musofirlarga qilingiz.

Qanday yaxshilik qilsangiz, shubhasiz, uni Olloh bilguvchidir».

Darhaqiqat, mustaqil yurtimizda buyuk bobolarimizning ibratli an‘analarini davom ettiradigan sobitqadam insonlar juda ko‘p. Bu yilimiz shunday saxiypesha insonlarning saxovat-u himmatini namoyon etadigan o‘ziga xos yil bo‘lib qoladi.

Nargiza RAZZOQOVA,
Toshkent shahar, Yunusobod tumanidagi
97-o‘rta maktabning 11-sinf o‘quvchisi.

**YAXSHILIK
YAXSHIDIR**



“OYBARCHINI O'YNAGANMAN”

Suratda mayingina jilmayib turgan qahramonimiz sizlarga yaxshi tanish bo'lsa kerak. Keyingi paytlarda Muqimiy nomidagi musiqali drama va komediya teatri tomonidan sahnalashtirilgan «Jaydari kelin» spektaklida yaratgan Mehri obrazi bilan barchaning ko'ngliga yo'l topishga ulgurgan Munojot ALIMBOYEVA tahririyatimizga mehmon bo'lib keldilar. Ular bilan bolalik, o'quvchilik paytlari haqida suhbatlashdik:

Bizning mehmon

TURLI O'YINLAR TASHKIL QILARDIM

–Bolalik davrini yodga olish barchaga quvonch bag'ishlaydi. Hayotda shunday paytlar bo'ladiki, beixtiyor bolalik davriga qaytgisi, qaytadan bola bo'lib qolgisi kelaveradi. Men Shayxontohur tumanidagi 26-maktabni tugatganman. Onam Mamlakat Alimboyeva shu maktabda boshlang'ich sinflarga dars berardilar. Ularning ishonchlarini oqlash uchun ham faqat a'lo baholarga o'qiganman. Bilasizmi, maktabda turli o'yinlar tashkil qilib, o'quvchilarni birlashtirishga harakat qilardim. Masalan, «Mo'jizalar maydoni» yoki topishmoqlar topish o'yinlarni o'ynab, g'olib o'quvchilarga sovg'alar tarqatardim. Sovg'alarim daftar, ruchka yoki flomaster... Xullas, kerakli o'quv qurollaridan iborat bo'lardi. Sumkamda doim sovg'a uchun deb biror narsa olib yurardim.

Yuqori sinflarga o'tganimdan so'ng adabiyotga havas uyg'ondi. Ustozimiz Hurriyat opa To'rabekova bizga g'azallarni, she'rlarni ifodali o'qishga o'rgatgandilar. Maktabdagi tadbirlarda raqsga tushib, qo'shiqlar aytardim. Maktabni tugatgach, oyimlarga havas qilib pedagogika litseyida tahsil olganman. Litseydagi tadbirlarda ham birinchilardan bo'lib qatnashardim. Mening iste'dodimni, san'atga bo'lgan havasimni ko'rgan ustozlarim menga Teatr va rassomchilik institutiga hujjat topshirishimni maslahat berishgandi. Shu tariqa san'atning sehrli olamiga kirib qolganman.

USTOZLAR KO'MAGIDA...

–8-sinfda o'qib yurgan kezarimda «Nurli kelajak» tanlovida Yulduz Usmonovanning «Bolaligim, seni sog'indim» qo'shig'ini ijro etganman. Bilasizmi, o'sha paytdagi hayajonimni sira ham tasavvur qilib bera olmayman. Teatr va rassomchilik institutiga kirganimdan so'ng ikkinchi kursda o'qib yurgan kezarimda Muqimiy teatrining bosh rejissyori kelib Oybachin roliga tanlov bo'layotganligini aytdilar. Men ham o'zimni sinab ko'rish maqsadida tanlovda qatnashdim va g'olib bo'ldim. «Alpomishning qaytishi» spektaklidagi Oybachin rolini menga berishdi. O'sha paytda talaba bo'lganim bois, katta sahnaga chiqish uchun menga dalda kerak edi. O'zbekistonda xizmat ko'rsatgan artist Mirza Azizov hamda O'zbekiston xalq artisti Zulayho Boyxonovalar yaqindan yordam berishdi. Mirza Azizov Alpomishning rolini o'ynash bilan birga menga yordam berib



turdilar. Shu tariqa ilk rolimda Oybachinni o'ynaganman.

O'ZIMNI UNUTAMAN

Institutni tugatgach, Muqimiy nomidagi musiqali drama va komediya teatriga ishga kirdim. O'zim havas qilib yurgan aktyor va aktrisalarni bilan birga ishlash menga kuch va zavq bag'ishlardir. Keyinchalik qator spektakllarda turli rollarni ijro etdim. «Baxtli bo'l, dugonajon!» spektaklidagi Vazira, «Osmonni bag'ri keng» spektaklidagi Baxtigul, «Ko'nglimning ko'chasi» spektaklidagi Yoshlik, «Farishtali ayol» spektaklidagi Nazokat, «Muhabbatim – qismatim» spektaklidagi Ozoda obrazlari shular jumlasidandir.

–Qator spektakllarda ijobiy va salbiy rollarni yaratgan ekansiz. O'zingiz sevib ijro etadigan rolingiz bormi?

–San'atkor sahnaga chiqishdan oldin o'zini unutib ijro etadigan obrazining «ichiga kirib ketishi» kerak. Sahnaga chiqishdan oldin ijro etayotgan qahramonimning obraziga kirib ketaman. Tomoshabin ham sergak turadi. Rolni chin dildan ijro etayapsizmi, yo'qmi darrov sezadi. Sevib o'ynaydigan rolim «Jaydari kelin»dagi Mehri obrazi. Bu spektaklda qaynonam rolini teatrdan Odina opa G'oziyeva, televizordagi esa Maryam opa Ixtiyorova ijro etishgan.

–Ustozlaringiz haqida nimalar deya olasiz?

–Ustozim Zulayho Boyxonovaga juda havas qilaman. Yurish-turishda, sahnada o'zini tutishda ularga o'xshashni istayman.

–Siz katta-yu kichik sevib tomosha qiladigan «O'talar so'zi» aqlning ko'zi ko'rsatuvida ham qator obrazlar yaratgansiz...

–Bu ko'rsatuvga ham ko'p marta taklif qilishgan. Iste'dodli aktyor Dilmurod aka Uzoqov bilan qator obrazlar yaratganmiz. Rol o'ynashdan tashqari qo'shiqlar ham aytib turaman. «Tomchi», «Sensan» qo'shiqlarini, «Oltin meros» turkumidan beriladigan ko'rsatuvda «Tanovar» qo'shig'ini kuylaganman. Yana turk, ingliz tillarini ham bilaman.

–Kelajakdagi orzularingiz qanday?

–Orzuim teatrdan tomoshabinlarning yodida qoladigan rollar yaratish. Hozir teatrimizda «O'tgan kunlar» spektaklini qo'yish arafasida turibmiz. Bu spektaklda Zaynab obrazini talqin qilaman.

–Suhbatimiz so'nggida bolajonlarimizga tilaklaringiz?

–Bugungi kunimizning ertasi shu bolajonlardir. Kelgusida komil inson, ma'naviyatli, madaniyatli bo'lislari uchun tinmay izlanishlari, o'qishlarini istardim.

–Mazmunli suhbatimiz uchun tashakkur!

Ozoda TURSUNBOYEVA suhbatlashdi.

TONG yulduzi

BOSH MUHARRIR:

Umida

ABDUAZIMOVA

TAHRIR HAY'ATI:

Turobjon JO'RAYEV

(O'zbekiston Xalq ta'limi vaziri),

Dilbar ALIMJONOVA

(«Sog'lom avlod uchun»

hukumatga qarashli bo'lmagan

xalqaro xayriya jamg'armasi

ijrochi direktori),

Qahramon QURANBOYEVA

(«Kamolot» YOIH markaziy

kengashi raisi o'rinbosari),

Jabbor RAZZOQOV

(«O'zbekiston» NMIU bosh

muharrir o'rinbosari),

Dilmurod RAHMATILAYEV

(Andijon viloyati Xalq ta'limi

boshqarmasi boshlig'i),

Dilshoda DADAJONOVA

(Namangan viloyati Xalq

ta'limi boshqarmasi boshlig'i),

Feruza JALILOVA

(Bosh muharrir o'rinbosari),

Sobirjon SHARIPOV

(Xorazm viloyati Xalq ta'limi

boshqarmasi boshlig'i),

Ergashvov SARIQOV

(Iqtisod fanlari doktori).

Gazeta O'zbekiston matbuot va axborot agentligida

022-raqam bilan 2003-

yil 11-dekabrda

ro'yxatdan o'tgan.

Noshir:

«O'zbekiston»

nashriyot-matbaa ijodiy uyi.

Gazeta

«O'zbekiston»

nashriyot-matbaa ijodiy uyi

kompyuter bo'limida terib

sahifalandi va chop etildi.

Gazeta haftaning dushanba

kuni chiqadi. Hajmi A-3,

2 bosma taboq.

Adadi - 58001

Buyurtma N: J 3268

Dizayner va sahifalovchi:

Fazliddin

SHOYODGOROV

Navbatchi:

Ozoda

TURSUNBOYEVA

Rassom:

Nodira MIRZAYEVA

Manzilimiz:

700129,

Toshkent shahri,

Navoiy ko'chasi, 30-uy.

Obuna indeksi: 198.

e-mail:

tong1924@mail.ru

Tel: 144-27-25

144-63-08

Tel/ faks:

(99871) 144-38-10

Bolajonlarimiz a'lo baholarga
oqib katta bolganlarida
buyuk inson bolishsin.

Peiuf -